

Subota, 18 Juni 2011. godine

Sinoć u BKC-u Tuzla održan koncert grupe "Legende"

U prepunoj dvorani Bosanskog kulturnog centra Tuzla sinoć je održan koncert jedne od najuspješnijih starogradskih i pop grupa sa prostora ex Yu - beogradske grupe "Legende".

Drugi susret sa tuzlanskom publikom bio je dirljiv i emotivan. „Legende“ su nagrađivane dugotrajnim aplauzima kako za stare tako i za numere sa posljednjeg albuma "Sjaj od plamena".

"Zbog velike zainteresiranosti za koncert grupe „Legendi“ koji se održao u BKC-u Tuzla u aprilu prošle godine, kada su karte rasprodane za tri dana a mnogi zainteresirani nisu mogli uživati u izvedbi velikih hitova „Legendi“ poput: "Ne vjeruj", "Četrdesete", "Zaboravi" i "Ej mladosti", odlučili smo da i u ovoj koncertnoj sezoni, između ostalih velikih izvođača, organiziramo koncert „Legendi“, kazao je direktor Bosanskog kulturnog centra Tuzla Semir Fejzić.



Osvrnuvši se na specifičan zvuk njihovih pjesama pjevač Ivan Milinković kaže: „Naša muzika tek u zadnjih par godinama, nalazi veliki upliv i odobravanje kod publike. Ono što nam je bitno jeste da nas ljudi prepoznaju po dobroj volji i po ljubavi koja opisuje grupu

„Legende“.

„Zadovoljstvo nam je biti opet u Tuzli u Bosanskom kulturnog centru. Mnogo topline i emocija je bilo na prošlom a i ovom koncertu. Koncertna dvorana kojom raspolaže BKC Tuzla referentna je i odlična za koncerte ovoga tipa kroz koju možemo iskazati ono što grupa „Legende“ i njena muzika nosi“, kazao je Milinković.



„Jedva smo čekali poziv da se vratimo u Tuzlu. Nadamo se da ćemo se družiti češće u budućnosti. „Legende“ pripremaju novi album sa dvanaest novih i starih pjesama, „Najveći hitovi“ za Hayat produkciju. Uradili smo i spot za pjesmu „Tamburaši“, koji izvodimo sa Halidom Bešlićem, kazao je Zoran Dašić.

U svojoj kolekciji priznanja grupa ima deset Oskara popularnosti, osam priznanja "MELKO", šest "Zlatnih melosa", "Zlatni violinski ključ" PGP-a za tiraž, četiri "Zlatne ploče", te nagradu Beovizije za pjesmu iz filma "Jesen stiže Dunjo moja". Također grupa je dobitnik Zlatne palme i Beogradskog pobjednika.

BKC Tuzla